



JUDICIAL SYSTEM MONITORING PROGRAMME PROGRAMA DE MONITORIZAÇÃO DO SISTEMA JUDICIAL

Komunikado Imprensa

Periodu : Marsu 2010

Pubikasaun : Marsu 2010

Prezidente Parlamentu bolu atensaun ba deputadus sira atu hala'o sira nia knar nu'udar representante povu ne'ebe diak

Iha fim fulan Feveiriu 2010, Parlamentu Nasional (PN) hahu debate kona ba Lei Seguransa Nasional ne'ebe apresenta husi Sekretario Estado ba asuntu Seguransa (SEAS) Sr. Francisco Guterres iha plenaria. Maske diskusaun han tempu naruk utoan, maibe ikus mai prosesu plenariu ne'e pasa ho afavor: 22, kontra: 2 no abstein: 9.

Wainhira remata tiha votasaun ba lei refere, Parlamentu Nasional kontinua ho plenaria hodi halo diskusaun kona ba Lei Defeza Nasional ne'ebé apresenta husi Sekretario Estado ba asuntu Defeza (SED) Sr. Julio Tomas Pinto, no hetan resposta positivu hosi distintus deputadus sira kona ba lei ne'e, tanba lei ne'e importante ba Estado Timor Leste, nune'e evita konfuzsaun iha seitor seguransa, liu-liu iha tempo krize hanesan tinan 2006 liu ba. Lei ne'e pasa ho klasifikasaun afavor: 30, kontra: 0 no abstain: 5.

Tuir mai iha loron 15 Marsu, Parlamentu hahu fali debate kona ba Lei Seguransa Interna, ne'ebé mak apresenta husi Sekretario Estado ba Asuntu Seguransa Sr. Francisco Guterres no ikus mai hetan apoiu hosi deputadus hamutuk nain 36 ne'ebé mak hotu-hotu vota afavor.

Husi observasaun JSMP, Parlamentu Nasional nia servisu hodi diskuti kona ba Lei Seguransa nian iha ona progresu maka'as, tamba iha semana ida liu ba kotuk, deputadu sira fo tempo atu diskuti no aprova lei tolu tu-tuir malu deit; hanesan Lei Seguransa Nasional, Lei Defeza Nasional no Lei Seguransa Interna. Lei tolu ne'e aprova liu hosi agenda plenaria extra-ordinaria. Mesmu nune'e, nafatin iha distintus deputadu balun mos la fo atensaun maximu ba lei hirak ne'ebé mak sei fo impaktu maka'as ba vida no distiñu nasaun liu-liu sira nia konstituente ne'ebe politikamente sira representanta. Situasaun ne'e bele hare hosi deputadu balun nebe mai tarde, no ikus mai tenki adia tan plenaria ba tempu seluk, tanba quorum la to'o. Tuir rejimentu Parlamentu Nasional nian iha artigu 67 sobre regra jeral defini katak *atu halo votasaun presija deputadu sira prenze metade husi total memberus Parlamentu Nasional ou presija distintus deputadus nain 33 husi total 65*. Wainhira plenaria la prenze korum mak deputadus sira halo votasaun deit entaun lei ne'e invalidu tuir artigu 167 kona ba prinsipiu jeral prosesu lejislativu nian.

Durante periodu hala'o diskusaun no votasaun ba lei importante tolu ne'e iha semana hirak nia laran, Prezidente Parlamentu Nasional Sr. Fernando Lasama bolu atensaun dala rua ba deputadus sira atu hala'o sira nia knar didiak no ho reseponsabilidade nu'udar representante povu. Iha loron Kuarta-Feira, 10 Marsu, Prezidente Parlamentu Nasional Sr. Fernando Lasama afirma ba

deputadu sira atu tuur hakmatek hodi diskuti lei kona ba seguransa nasional no halo votasaun ba lei ne'e. Hafoin ida ne'e, iha Tersa-Feira, 16 Marsu, Prezidente PN Sr. Lasama apelu dala ida tan ba deputadus sira atu konsidera tempu no fo prioridade ba diskusaun ba Lei Seguransa Interna hodi halo votasaun final ba lei refere. Tanba preukupa no lamenta teb-tebes ho atitude deputadu sira nian ne'e, iha observador nasional no internasional sira nia oin, Prezidente PN mos husu ba media hotu ne'ebe mak asiste plenaria iha Uma Fukun atu fo sai ba publiku kona ba lalaok deputadus sira nu'udar representante povu iha Uma Fukun Parlamentu Nasional ne'ebe la kumpri sira nia obrigasaun no la tuir regras no tama sai salaun plenaria tuir sira nia hakarak.

Tuir JSMP nia hanoin katak, lalaok deputadus balun ne'ebe la fo importansia ba prosesu lejislasaun no lei sira ne'ebe merese atu diskuti urjente ba interese povu no nasaun nia vida, bele sai nudar imajen negativu ba povu no hamenus sira nia papel institusional ne'ebe tuir lei haruka. Atitude politika hanesan ne'e mos konsidera nu'udar pratika ne'ebe minimiza no desapresia konfiansa povu nian ne'ebe fo ba sira liu husi prosesu demokratiku-elisaun nasional. Tuir lolos deputadus sira nebe mak iha kompetensia boot atu lejisla lei ba povu nia vida tuir Artigu 95 Konstituisaun RDTL, tenke fo perioridade no importansia boot liu tuir sira nia mandatu prinsipal atu halo lei, halo desizaun politiku no fiskaliza programa no atividade governu nian. Ho nune'e deit mak sira bele sai duni sentru ba aspirasaun no representante povu nian iha Parlamentu Nasional.

JSMP hein katak ba oin, distintus deputadus sira tenke konsiente hodi hala'o sira nia knar ho diak nu'udar povu nia lian hodi reprenzenta povu nia interese no produs lei ne'ebe bele hatan ba preukupasaun povu nian no hodi servi ba interese ema hotu nian, liu-liu atu reflata prinsipi sira kona-ba valores demokrasia, estadu de direitu no direitus umanus.

Makse preukupa ho situasun hirak ne'e, JSMP hakarak kongratula distintus deputadu sira ba esforsu no tempu atu agenda plenariu lei importante hirak ne'e. Maske lolos deputadus sira iha dever atu tama servisu ho oras no mos atu partisipa iha diskusaun no votasaun tuir Artigu 10 Regimento Interna Parlamentu Nasional, maibe JSMP hanoin katak, esforsu hirak ne'e merese hetan apresiasaun. Maske nune'e JSMP nafatin subliña atu hadia jestaun servisu deputadu ida-idak nian tuir agenda Parlamentu Nasional atu evita adiamentu sira ne'ebe la nesesáriu.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun e-mail: luis@jsmp.minihub.org

Landline: 3323883